

Prof. dr. Merima Čaušević
Univerzitet u Sarajevu / University of Sarajevo
Pedagoški fakultet / Faculty of Education
mcausevic@pf.unsa.ba

NOVI PRISTUPI IZDAVAŠTVU NA UNIVERZITETU U SARAJEVU

NEW APPROACHES TO UNIVERSITY OF SARAJEVO'S PUBLISHING ACTIVITIES

Obilježavanje datuma *Nacionalnog dana svjesnosti o bibliotekama u Bosni i Hercegovini* pod motom „Biblioteka – mjesto susreta“ istovremeno je motiv da se predstavi korak naprijed u izdavaštvu Univerziteta u Sarajevu i obilježi 111. rođendan časopisa *Pregled – časopis za društvena pitanja*, čiji je izdavač Univerzitet u Sarajevu od 1967. godine. U realizaciji ovog događaja od 29. 10. 2021. na Univerzitetu u Sarajevu učestvovali su: Univerzitet u Sarajevu, Sveučilište u Mostaru i Kantonalna i univerzitetska biblioteka Bihać. Cilj događaja bio je kroz savremeniji pristup ukazati na značaj i kontinuiran doprinos biblioteka u izgradnji društva znanja. Direktorica Biblioteke Univerziteta u Sarajevu i koordinatorica Akcijske grupe Nacionalnog dana svjesnosti o bibliotekama u BiH u ime Univerziteta u Sarajevu mr. sc. Nadina Grebović-Lendo u uvodnom obraćanju iznijela je niz najznačajnijih podataka o više od 50 različitih aktivnosti edukativnog sadržaja (promocije, večeri poezije, okrugli stolovi, izložbe i sl.) upriličenih i realiziranih za građane u okviru ovogodišnjeg obilježavanja datuma značajnog za biblioteke u Bosni i Hercegovini.

Nacionalni dan svjesnosti o bibliotekama u Bosni i Hercegovini za 2021. godinu na UNSA je započeo održavanjem webinaru za bibliotekare pod nazivom „Ideje za odgojno-obrazovni rad s djecom i mladima u digitalnom okruženju“. Predavačice na webinaru bile su doc. dr. Emina Dedić Bukvić i mr. sc. Mirela Šuman. Istim povodom, u Rektoratu Univerziteta u Sarajevu održano je i savjetovanje o temi „Uloga univerzitetske biblioteke u povećanju vidljivosti naučnih radova“. Prvi dio savjetovanja bio je posvećen promociji časopisa *Pregled – časopis za društvena pitanja* na novoj platformi – Open Journal Systems (OJS). Događaj je otvoren obraćanjem prorektorice za nastavu i studentska pitanja UNSA prof. dr. Dženane Husremović koja je istakla vrijednost i značaj postavljanja časopisa na navedenoj platformi, jer „pored povećane vidljivosti naših izdanja, mi smo


sada stvorili uslove za indeksiranje u različitim bazama podataka, što nam opet daje niz novih mogućnosti koje trebamo itekako iskoristiti. Ovo je još jedna potvrda da Univerzitet u Sarajevu može i mora ići ukorak s vremenom i permanentno uvoditi nove tehnologije koje čine naučnoistraživački rad vidljivijim u akademskim krugovima.“

Savjetovanje je nastavljeno obraćanjem glavnog urednika časopisa prof. dr. Senadina Lavića koji je reminiscencijom na razvojni put jednog od najstarijih časopisa za društvena pitanja u BiH potvrdio nacionalni i univerzitetski značaj časopisa. Upravo historijski background časopisa je jedan od značajnih preduslova za uključivanje istog u savremene tokove izdavaštva, kao što je objavljivanje časopisa u savremenijoj i dostupnijoj formi putem nove platforme, Open Journal Systems, a samim tim činom i daljnje uključivanje u relevantne baze podataka. Prof. dr. Lavić je istakao moderan koncept časopisa, bez klišea i ograničenja, jer „on prati čitav složeni život u zemlji, te kao savremen i aktuelan časopis obuhvata književna, kulturna, privredna, politička i intelektualna previranja i kolebanja savremenog trenutka“, i dodao da se, osim tematskog bloka posvećenog elaboraciji nekog od bitnijih socijalnih fenomena, u sadržaju svakog broja objavljuju teorijske rasprave, istraživačke studije, osvrti, prikazi, prilozi i prijevodi. Tome u prilog idu i posljednje bibliografije časopisa *Pregled* iz uredničkog pera prof. dr. Senade Dizdar i prof. dr. Lejle Hajdarpašić priređene u 2020. godini, a koje su pokazale kvantitativno-kvalitativnu različitost objavljenih radova, mnogostranost i multidisciplinarnost tema i sadržaja kojima su se autori iz cijele Bosne i Hercegovine, regije i šire, iznošenjem društvenih, humanističkih, prirodoslovnih i drugih saznanja, promišljanja, istraživačkih rezultata i sl. predstavili javnosti i dodatno potvrdili aktuelnost samog časopisa i potrebu za njegovim daljnjim afirmisanjem u naučnoj i stručnoj domeni.

Glavni i odgovorni urednik prof. dr. Senadin Lavić i članovi aktuelne Redakcije časopisa *Pregled*: akademik dr. Mirko Pejanović, prof. dr. Jasmin Ahić, prof. dr. Izet Bajramović, prof. dr. Merima Čaušević, prof. dr. Elvir Čizmić, doc. dr. Amer Osmić, doc. dr. Amela Dautbegović, prof. dr. Amir Duranović, prof. dr. Enes Durmišević, prof. dr. Salih Fočo, emeritus, te Fuada Muslić-Haseta, dugogodišnji sekretar Redakcije i šef Službe za izdavačku djelatnost Rektorata Univerziteta u Sarajevu, zajedno kontinuirano rade na ostvarenju strateškog cilja – uključenost u svjetske baze podataka te prepoznatljivost u internacionalnoj naučnoj zajednici, čemu će svakako doprinijeti i promocija časopisa na novoj, OJS platformi. Značaj događaja obilježila je i izložba o izdavačkoj djelatnosti Univerziteta u Sarajevu, koju je priredila upravo Služba za izdavačku djelatnost Rektorata Univerziteta u

Sarajevu, na kojoj se moglo osvjedočiti u bogatstvo univerzitetskih izdanja, a značajno mjesto časopisa *Pregled* u razvoju Univerziteta u Sarajevu prepoznato je i kroz jedno od posebno zanimljivih priznanja u tradiciji prošlih ali relativno skorih vremena: „Odlikovanje ordenom bratstva i jedinstva sa zlatnim vencem, dodeljeno ukazom predsednika Socijalističke Federativne Republike Jugoslavije Josipa Broza Tita od 30. oktobra 1970. godine“.

Fotografija 1: *Povelja o “Odlikovanju ordenom bratstva i jedinstva sa zlatnim vijencem”, dodijeljeno ukazom predsjednika Socijalističke Federativne Republike Jugoslavije Josipa Broza Tita, Beograd 30. oktobra 1970. godine*



Nakon promocije časopisa i otvaranja izložbe, savjetovanje je nastavljeno izlaganjima o temi povećanja vidljivosti naučnih radova. O temi *Uloga sažetka/apstrakta u vidljivosti naučnih radova* govorila je prof. dr. Senada Dizdar sa Katedre za komparativnu književnost i informacijske nauke Filozofskog fakulteta UNSA, potom je prof. dr. Dušanka Bošković,

prorektorica za kvalitet UNSA, govorila o temi *Publikovanje rezultata istraživanja sa povećanim faktorom utjecaja*, dok je o temi *Elektronsko izdavaštvo i autorsko pravo* govorila prof. dr. Iza Razija Mešević sa Pravnog fakulteta UNSA. Posljednje izlaganje imao je doc. dr. Franjo Pehar sa Sveučilišta u Zadru, predstavivši projekat *Morepress* Sveučilišta u Zadru.

Na kraju ovog sažetog osvrta na obilježavanje datuma *Nacionalnog dana svjesnosti o bibliotekama u Bosni i Hercegovini* i posebno značajnu promociju časopisa *Pregled – časopis za društvena pitanja* na novoj platformi, Open Journal Systems, poželimo časopisu, kao jednom u nizu bosanskohercegovačkih Feniksa, dugotrajno i kvalitetno bitisanje na čast akademskoj zajednici Univerziteta u Sarajevu ali i cijeloj Bosni i Hercegovini uz punu akademsku odgovornost za rast i razvoj časopisa koji je dio mozaika progresa Bosne i Hercegovine od samih početaka do danas.